

{play}images/stories/mp3/Ave\_maria\_schubert.mp3{/play}

## PRESEPIU ANTICU



Pertemu pi tia, pi vidiriti e pi salutariti!  
Passamu lu desertu, vaddri e munti,  
munti e vaddri pi veniri a 'durariti.

Assai tempu ci vosi pi stu viaggiu,  
e sulu lu ventu pirdennusi all'orizzonti,  
ca paria nun finiri mai, nni dava curaggiu.

E natri c'un ranni gestu di li vrazza  
la sicca e nfucata sabbia nni livamu  
pulizziannuni ancora la facciazza.

Stu fattu si ripitù pi tanti ghiorna e pazenziusi  
e cu lu solitu largu e ranni gestu di li vrazza  
la facci nni puliziamu di ddri sabbii calurusi.

Stanchi, sfinuti e morti di siti seguitammu  
pi tanti iorna finu c'arrivamu a lu capu d'annu  
quannu 'mprovvisamenti curiusi fummu.

E di luntanu, assai e tantu luntanu luntanu  
l'astru di la longa cuda si firmò subitu di scattu  
comu si cci avissi finetu lu carburanti stranu.

Nni taliamu nta la facci e nun ci capemu.  
Dintra di natri c'era quarchi cosa com'un scantu  
ma decisi e pronti versu la cuda nninniemu.

C'era un scantu, quarchi cosa ca nni stupiu.  
Un friddu nni fici trimari e nni fici moviri i denti.  
Nni taliamu nta la facci ma nuddru cci capìu.

Si vidianu in ranni lontananza tanti stiddri  
fermi ncapu la terra e cu la vogghia di capire  
ddri ranni misteri, puntamu versu li cchiù beddri

Nni taliamu nta la facci ma nun ci capimmu.  
Dri stiddri sempri cchiù ranni si facianu  
quasi a illuminarinni lu ran camminu summu.

Vidennu ca la sabbia cchiù picca si facìa  
e vidennu cu ddri luci quarchi casatu  
la stanchizza nni sfinìu! Se! Nni sfinìu!

Lu nnumani, a ghiornu avutu, nni truvamu sdraiati  
vicinu a li nostri fideli armala e subitu nni susemu  
e nni ndirizzamu versu ddri luci avuti e addrumati.

L'occhi, doppu aviri taliatu lu desertu nfucatu  
appena vittimu ddrà pineta si misiru a lacrimari  
e caminannu caminannu vittimu un caseggiatu.

Cuntenti, senza sentiri cchiù la siti torturari  
Nnanzi a na strata mistiriusa nni truvammu  
Mentri si sintianuli ciarameddi cantari cantari.

Dri canti comu si fussiru tanti corali  
Sunannu sunannu jennu avanti nni facianu sognari  
E cchiù ranni si sintianu pi natri poviri mortali.

Vicinu la cittati, na strata luntana di lu mari  
Nni nvitava a trasiri nta la vecchia pupulusa cittati  
Mentri l'avutra muta e fema si facia scapisari.

Mansa comu l'agneddru prontu a farisi ammazzari  
Stava ferma e paria ca nni dicissi: seguimi murtali!  
Vai avanti veloci! Scapisami nun ti preoccupari!

Sugnu na stratuzza e vi cunnuciu unnni nasciu lu beni  
E a la larga vi strascinu di lu mali! Ma natri pinsamu  
Di iri a latru latu di via cu tuttu chiddru chi nni cummeni.

Pi la strata s'incontrau n'omu silinzusu  
Caminava drittu iennu avanti a testa vascia;  
pesanti lu so rispiru, e cu lu sguardu penzusu.

Vidennuni arrivar inni dissì: a vatri e a tia messeri  
Vatri ca pariti regnanti picchì iti versu lu mali?  
Forsi nun sapiti ca nasciu lu novu redentori?

Natri ca purtavamu rispettu a lu signuri di sti banni  
e versu lu casteddu di Erodi nn'avviammu  
senza sentiri a ddru brav'omu e senza fari dumanni

Trasennu nta la cittati nni taliavanu malamenti  
e cu l'occhi dicianu: na morti subitania v'avissi a veniri  
ma trasemu nta lu casteddrue nni putaru nta lu rignanti

Iddru cu na vuci rascaddrusa rapia la vucca  
E taliannu a natri nni dissì: A vatri d'orienti bennevuti!

Sappi c'arrivastivu e ca siti diretti a la riali rocca!

Natri, cuntenti di essiri nati nta ddri terri d'orati:  
rispunnemu: rannissimu di tuttu lu circondariu tò,  
la notizia c'arrivò a l'oricchi tò è vera maestati

Lu ventu nni purtà na notizia ca nasciu un regnanti  
Cchiù ranni di tutti li re mortali e non pi curiosari  
Ma pi assicurarinni di sti vuci e di stu re splendenti.

Iddru a natri: Cari furisteri! lu sugnu l'unici re!  
E chiunchi sti terri mi vulissi arrubbari  
La morti prima di lu regnu s'accattassi testè!

Putiti irivinni ma arricurdativi, voi di mia nun degni  
Di ripassari pi sti terri e darimi la beddra notizia  
Di lu celesti regnanti! Videmma iu cercu li so signi!

Nun ni persuadiu Erodi pi drru stranu discursu.  
Cu tanta prescia li nostri bestii jemu a ghiungiri  
Mentri la vuci a lu bivi unni parrava nta lu percursu.

Savi di tri furistera! Trasiti nta chista strata  
E aviti modu di capiri e scopriri la luci divina!  
Veni avanti mutali di unre! Trasi nta la cuntrata.

Nun esitari! Arriverai accussì a lu nicu bambinu  
Ma pi la verità ranni! Chi ossa di l'universi interu!  
A sti paroli allungamu lu passu pi lu camminu.

L'armala ncuminciarunu a camirari cuntenti  
Forsì picchì vulianu subitu livarisi lu pinseri  
E ripusarisi all'ummira di li nostri ranni tenti.

Natri seguitammo e pi la strata n'omu sunava  
Li ciarameddi caminannu nta la stessa direzioni  
Era n'omu curtu di statura na palla chi caminava.

Superammu a iddu e di luntanu vittimu un pratu  
Chi dava cuntentu la so erva virdi a tanti picureddri  
E pocu luntanu lu picuraru a giucchiuni piegatu.

Li pecuri parianu scavari la nivi pi mangiari  
Mentre ogni tantu lu picuraru friscava a li pecuri  
Comu si ci parlassi a ddri compagni d'avventuri.

Poi si vidia un cacciaturi chi 'nseguia n'aceddru.  
Lu mischinu capennu lu periculu s'ammucciava  
Supra un ramu dunni c'era natru armaleddru.

Appuiatu c'era n'omu cu li mani dintra li sacchetti  
Taliava cu tristizza e meravigghia li nostri armala  
Taliava a natri due bianchi e unu nivuru tutti perfetti.

Nni salutava e accussì rivurgennumi a iddu ci chiesi:

## Presepiu anticu

Scritto da Totò Mirabile

Venerdì 26 Novembre 2010 12:32 - Ultimo aggiornamento Mercoledì 22 Dicembre 2010 01:44

---

Tu nun vai versu sta dirizioni pi scudariti la tristizza  
Iddru rispusi: si passu di ddrocu fazzu cosi schifosi.

Iu a iddru: bon'omu nun vi muviti mai e poi mai  
Picchè anchi si li sciumi russi addiventerannu  
Nenti concrudi e sarai malidiciutu di tutti assai.

Mi taliò cu l'occhiu marvaggiu e nun m'arrispunnu.  
Natri allura ninniemu seguitannu pi la nostra strata  
E c'era na casa cu na campana chi facia tintinnù

Dintra a chissa un picciriddru cu na picureddra  
un'omu curcatu longu longu nterra appuiatu  
chi vicinu a lu focu bivia vinu cu la baccareddra.

Di poi ddru cavuru addivintò comu si fussi oppiu  
e doppu anticchia s'addrummisciù anchi si so figghiu  
lu chiamau ma ci fici signu di no cu lu me occhiu.

Poi lu rossu zanpugnaru chi facia scurdari  
Li tristi pinsera cu ddri sunati beati  
Mentre na fimmina continuava a caminari

A la destra unlongu filaru di robbi stinnuti  
A na rossa corda appizzati stavau asciugannusi  
E du palummi supra un filu stavanu sospesi.

Supra la testa di ddra fimmmina robusta  
Na quartara di crita in equilibrio ben sospesa  
Paria ca avissi un'anima armonica giusta

Dra quartara, lu capimmo poi, c'era acqua  
Pi dariccilla a viviri a un'omu cu la simenza  
Ca cu na ran vrazzata nni siminava tecchia.

Nta l'atru filaru di robbi stisi na fimmmina ranni  
lavava la so robba lorda e a lu bordu di lu lagu  
ogni tantu s'avvicinava l'anatra di li russi pinni.

La fimmmina nun pristava attenzioni alla notizia  
ma continuava a torciri ddra ntissuta coperta  
e cu l'occhi nni taliava attentamenti cu malizia.

Di la facci si vidìa lu sforzu di la so vucca  
Sicchi li manu e cu li irita fini facia soni dilicati  
un picciutteddru di ddra supra di la rocca.

L'anitri puvireddrisi firmarono e paria  
C'ascutassiru li noti di ddrum picciutteddru  
Che cu ranni piaciri sunava ddr'armonia.

Emu avanti finu a quannu ncuntrammu un ponti  
Unni sutta scurria un sciumi ca cu lu so scrusciu  
Arrivava a lu mulinu nun luntanu di lu munti.

## Presepiu anticu

Scritto da Totò Mirabile

Venerdì 26 Novembre 2010 12:32 - Ultimo aggiornamento Mercoledì 22 Dicembre 2010 01:44

---

Cu li pali ca giaravanu, sfruttannu l'acua mpinnenza,  
facennu firriari li macini ca macinavano lu furmentu  
si vidia curriri e savutari un scoiattulu cu mponenza.

Scecchi e cavaddri s'abiviravanu pi arrinfriscaris  
e cu ddr'acqua frisca e biniritta di ddrà biviratura  
lu pisu chi pertavannu ncoddru ci paria alliggiriris.

Po na fimmmina ci pertava lu mangiari a li gaddruzzi  
Quarchi pezzu di pani duru arristatu misi ammoddru  
Mentri li figghiola iucavanu cu la nivi a baddruzzi.

Poni si sintia na vuci gridari: Viniti genti!  
Di stu latu pigghiati! Viniti genti piccaturi!  
Sintennu sta vuci nni iungemu a li passanti.

Sta vuci gridava sempri cchiù forti e ci spiammu:  
Picchi tutta sta zona avvertiti cu sti rossi vuciazzati?  
Iddu a natri: Viniti ora genti! Doppù nni parlammu!

Arrivati alla rutta tutta goccilanti cu tanti ntunnu  
La casa di un re fattusi omu! Un re terrenu!  
Visitati lu bammineddru cchiù beddru di lu munnu!

Nudu stani a latu di armali da iddru criati!  
Viniti genti, viniti piccaturi, viniti genti e genti!  
Cussì dicennu s'alluntanava biatu tra biati!

Di poi continuammo e isannu lu sguardu a lu celu  
Vittimu ddrà stiddra filanti firmarisi supra na capanna;  
Curri currennu, supra li spaddri nni s'arrizzò lu pilu.

Pi la strata si vitti un'omu veniri ncontru a natri:  
Mai haiu vistu bammineddru accussì svegghiù!  
Oh chi splenduri pi l'occhi mei pi tutti e pi so matri.

A la vista di lu bammineddru l'omu è impazzìtu  
E proseguennu si cuminciavano a sentir i canti  
Ca prima nuddru avia cantato comu lu sbirdatu.

Nta la rutta ci misimu oru incenzu e mirra  
E vistu lu bammineddru di la facci fina e reali  
Cridittimu ca chiddru era lu Diu scinnutu nterra.

Tremanti picchì sicuri nn'addinucciamu  
E l'adorammu puru natri li tre magi d'orienti,  
e cu Maria e Giuseppi nni congratulammu.

Gesuzzu, Giuseppi e Maria eranu cuntenti  
E accussì ritreturnamu nta li nostri terri all'orienti  
Per dari notizia a tutti l'omini e a la nostra genti.

Totò Mirabile

## **Presepiu anticu**

Scritto da Totò Mirabile

Venerdì 26 Novembre 2010 12:32 - Ultimo aggiornamento Mercoledì 22 Dicembre 2010 01:44

---